

- प्रधानमंत्री नरेन्द्र मोदी तीन देशों की आपसी यात्रा का पैला दौर मांय आज साइप्रस पूर्या—श्री मोदी कया—वां की यात्रा दोन्यू देशों के बीच ऐतिहासिक संबंधों ने और मजबूत करेला।
- प्रदेश मांय वंदे गंगा जल संरक्षण—जन अभियान के तैत आज न्यारा—न्यारा जिला मांय समीक्षा बैठकों व्ही— प्रदेशभर मांय श्रमदान कार्यक्रम कर्या गया।
- सेना ऑपरेशन सिंदूर के दौरान मिल्या जन समर्थन खातर देशवासियों को आभार जतायो।
- प्रदेश मांय मॉनसून पैली की बिरखा सूं लोगों ने तेज गर्मी अर लू सूं राहत मिली—20 जून सूं बत्ती बिरखा व्हे सके है।

000

प्रधानमंत्री नरेन्द्र मोदी तीन देशों की आपसी यात्रा का पैला दौर मांय आज साइप्रस पूर्या। साइप्रस का राष्ट्रपति निकोस हवाई अड्डा माथे वां को गर्मजोशी के सागे स्वागत करया। श्री मोदी अठै दो दिन रहवेला। लारला दो दशक मांय किंण ई भारतीय प्रधानमंत्री की या पैली साइप्रस यात्रा है। भूमध्य सागर हलका के सागे भारत का संबंधों ने मजबूत करबा की दिशा मांय श्री मोदी की या यात्रा महताऊ कदम है। तीन देश, साइप्रस, कनाडा अर क्रोएशिया की यात्रा खातर रवाना होबा सूं पैली के कया के इण यात्रा सूं व्यापार, निवेश, सुरक्षा, प्रौद्योगिकी के सागे दोन्यू देशों के बीच ऐतिहासिक संबंधों ने और मजबूत करेला। बतायो जावे है के यात्रा का दूजा फेर मांय श्री मोदी कनाडा पूगेला। प्रधानमंत्री वठे जी-7 शिखर सम्मेलन मांय भाग लेवेला। श्री मोदी 18 जून ने क्रोएशिया जावेला।

000

प्रदेश मांय चलाया जा रिया वंदे गंगा जल संरक्षण—जन अभियान की प्रगति ने लेर आज न्यारा—न्यारा जिला मांय समीक्षा बैठकों राखी गई। इण ई कड़ी मांय उपमुख्यमंत्री डॉ. प्रेमचंद बैरवा उदयपुर मांय अहलकारों की बैठक ली। उपमुख्यमंत्री अभियान मांय उदयपुर की उपलब्धियों की सराहना करता थकां पूरी टीम ने बधाई दी। डॉ. बैरवा कया के वंदे गंगा अभियान केवल एक आयोजन नीं, बल्कि इण ने जीवन को अभिन्न हिस्सा बणाणो व्हेला। राजस्व अर उपनिवेश विभाग का मंत्री हेमंत मीणा प्रतापगढ़ जिला मांय वंदे गंगा जल संरक्षण जन अभियान अर बजट घोषणावां बाबत समीक्षात्मक चर्चा करी। वणा अहलकारों सूं जल स्त्रोतों की मरम्मत टेम माथे कराबा अर जलाशयों मांय जमी गाद ने हटाबा ने कया। संसदीय कार्य मंत्री जोगाराम पटेल लूणी का सरेचा मांय राख्या कार्यक्रम मांय शिरकत करी। वणा लोगों सूं कूआं—बावड़ी, अर तलाइयां ने सहेज र राखबा ने कया। डूंगरपुर मांय प्रभारी मंत्री बाबूलाल खराड़ी अहलकारों की बैठक लेर अभियान की प्रगति की समीक्षा करी। बालोतरा मांय गृह राज्यमंत्री जवाहर सिंह बेढम अभियान की प्रगति को जायजो कर्यो। वणा मीडिया सूं बातचीत मांय कया के सगळा ने मिलर परम्परागत जल स्त्रोतों ने बचाणो चाहिजे।

इण बीच, प्रदेशभर मांय आज भी अभियान के तैत कई गतिविधियां राख्यी गईं। जयपुर मांय सांसद मंजू शर्मा की अगुवाई मांय जनप्रतिनिधि अर भाजपा कार्यकर्ता रामगढ़ बांध माथे श्रमदान कर र मिट्टी काढी। कैबिनेट मंत्री अविनाश गहलोत झुंझुनू जिला का नवलगढ़ मांय अभियान मांय शामिल व्हे र जल स्त्रोतों को पूजन कर्यो। इण मौके श्री गहलोत कया के ओ अभियान जन आंदोलन बन गया है।

जल संसाधन मंत्री सुरेश सिंह रावत भरतपुर मांय जल संरक्षण का कामों को जायजो लेर अधिकारियों ने बत्ता पौधा लगाबा का निर्देश दिया। डीग मांय जलाशयों की साफ—सफाई करी गई अर ब्रजकामद सुरभि वन गौशाला मांय स्वच्छता अभियान चलायो गया। कोटपूतली—बहरोड़ मांय पढणियां रैली काढ र पाणी बचाबा को संदेश दियो। इण मौके कई होड़ों राखी गईं। झुंझुनू का जिला स्टेडियम मांय भी खिलाड़ी पाणी बचाबा की शपथ ली।

000

मुख्यमंत्री भजनलाल शर्मा आज पंडित दीनदयाल उपाध्याय अंत्योदय संबल पखवाड़ा की कार्य योजना बाबत बैठक करी। मुख्यमंत्री निवास माथे राख्यी इण बैठक मांय श्री शर्मा अहलकारों ने मुश्तैदी सूं काम करबा ने कया। श्री शर्मा कया के राज्य सरकार गरीब, काश्तकार, मोट्यार अर महिलावां का

विकास खातिर काम कर री है। बैठक मांय मुख्य सचिव सुधांश पंत समेत कई आला अहलकार मौजूद रिया।

000

उद्योग मंत्री कर्नल राज्यवर्द्धन सिंह राठौड़ राजसमंद मांय मार्बल कारोबारियां सूं मुलाकात कर वां री समस्यावां रा बारा मांय जाणकारी ली। इण मौके वे कया के प्रदेश रा मार्बल ने जीआई टैग मिले इण खातिर सगळा ने मिल र काम करणो पड़ेला। श्री राठौड़ कया के मोदी सरकार रा लारला 11 बरसां रे दौरान देश ने आत्मनिर्भर बणाबा खातिर काम कर्यो गयो है। इण मांय जनता रो भी घणो योगदान है। इण सूं पैली उद्योग मंत्री नाथद्वारा रा श्रीनाथजी मिन्दर मांय दर्शन कर, भाजपा नेतावां सूं मुलाकात करी।

000

सेना ऑपरेशन सिंदूर रे दौरान समर्थन, प्रशंसा अर आभार खातर नागरिकां रो धन्यवाद कर्यो। एक सोशल मीडिया पोस्ट मांय सेना कानी कह्यो गयो के आम लोगां ऊं वां ने घणी पानणियां मिली है, जिण मांय वणा आपरी देशभक्ति री भावना अर गर्व जतायो है। इण सूं सेना ने प्रेरणा मिलेला। सेना आश्वासन दियो के वे हमेशा राष्ट्र खातर समर्पित रहवेला।

000

प्रदेश मांय चौमासा पैली री बारिश होबा सूं लोगां ने तेज गर्मी अर लू सूं राहत मिली। आज कई जिला मांय मेह बरसबा सूं तापमान मांय गिरावट आई। घणखरां जिलां मांय आज बत्तो तापमान 35 सूं 40 डिग्री सेल्सियस रे बीच दरज कर्यो गयो, जो सामान्य सूं 5 सूं 6 डिग्री ताई कम है। अजमेर मांय दोपहर पाछे मौसम मांय अचाणचक आया बदळाव रे पछे आई बारिश शहर ने तर-बतर कर दीनो। पाली जिला रा सादड़ी, देसूरी अर नारलाई मांय कठे-कठे घटाटोप मेह बरस्यो। म्हाका खबरनवीस रे मुजब इण सूं लोगां ने गर्मी सूं राहत मिली है।

राजधानी जयपुर, दोसा अर ऊगणां जिला मांय भी दोपहर पाछे मेह बरसबा सूं मौसम सुहावणो व्हे ग्यो। मौसम महकमा रे मुजब उदयपुर, जोधपुर, बीकानेर, अजमेर, कोटा, जयपुर अर भरतपुर संभाग रा कुछेक हिस्सां मांय काल भी बादल गरजबा रे सागे मेह बरस सके है। मौसम महकमो उदयपुर अर जोधपुर संभाग मांय कठे-कठे मेह बरसबा री संभावना जताई है। वठी ने 20 जून सूं मेह बरसबा रा दौर रो दायरो बढ सके है। केन्द्र रे मुजब उत्तर-पश्चिमी राजस्थान अर आरे-सारे रा हलका अर 21 जिला मांय आंधी अर बारिश जारी रह सके है।

000

अंतर्राष्ट्रीय योग दिवस रा सिलसिला मांय आकाशवाणी जयपुर रा क्षेत्रीय समाचार एकांश री कानी ऊं संदेश श्रृंखला चलाई जा री है। आज सुणो जयपुर रा योग प्रशिक्षक राजेश कुमावत रो संदेश।

000

प्रदेश रा बी.एड. कॉलेजां मांय दाखिला खातिर आज पीटीईटी परीक्षा राख्यी गई। वर्धमान महावीर खुला विश्वविद्यालय कोटा री कानी ऊं सुंवारे 11 बज्यां सूं दोपहर दो बज्यां ताई एक पारी मांय या परीक्षा व्ही। परीक्षा मांय साफगोई बणाया राखबा अर नकल रोकबा खातिर करड़ा इंतजाम कर्या गया। परीक्षार्थियां ने बायोमैट्रिक जांच रे पछे ही परीक्षा केन्द्र मांय दाखिलो दियो गयो। इण खातिर जिलेवार उड़न दस्तां भी सेंटरां रो औचक जायजो कर्यो।

000

जैसलमेर मांय **धरती आभा जातिय ग्राम उत्कर्ष** अभियान आज सूं सरू व्हीयो। अभियान रे तैत चुण्या 28 गांवां मांय जनजातीय परिवारां रा कल्याण खातर शिविर लगार सरकारी योजनावां रो फायदो दियो जावेला। जिला स्तरीय कार्यक्रम जेठवाई ग्राम पंचायत मांय राख्यो गयो, जठै विधायक छोटू सिंह भाटी गांव वाळा सूं बातचीत कर वां ने सरकारी योजनावां रो बत्तो ऊं बत्तो फायदो उठाबा ने कया।

000

गुजरात रा अहमदाबाद विमान हादसा मांय हाल ताई 32 मृतकां रा डीएनए नमूनां रो मिलान व्हे चुक्यो है अर 14 शव वां रा घर आळा ने सूप दिया गया है। सिविल सफाखाना रा अतिरिक्त अधीक्षक डॉ. रजनीश पटेल बताया के मरण वाळां मांय 4 अहमदाबाद, 2 वडोदरा, एक खेड़ा, एक अरावली, एक बोटाद, 4 मेहसाणा अर एक उदयपुर सूं है। इण बीच गुजरात रा पैली रा मुख्यमंत्री विजय रूपानी रा डीएनए रो मिलान भी व्हे ग्यो है।

000